

## **BAB 2**

# **KEAMANAN DAN KESEJAHTERAAN**

## **MENURUT PERSPEKTIF WAHYU**

*Nik Yusri Musa dan Mohd Zain Mubarak*

### **PENDAHULUAN**

Perbincangan dalam bab ini akan memberi fokus kepada penjelasan konsep wahyu sebagai sumber ilmu. Seterusnya, bab ini akan menghuraikan perbandingan di antara Islam dengan Barat dari aspek sumber ilmu. Bab ini juga akan meneliti nas-nas berkaitan dengan keamanan dan kesejahteraan diri dan masyarakat.

Allah SWT ialah satu *zat wajib al-wujud*. Allah SWT ialah *al-Khaliq* iaitu Pencipta seluruh alam. Seluruh ciptaan-Nya adalah makhluk yang tunduk patuh kepada-Nya sama ada secara terpaksa atau sukarela. Manusia merupakan sebahagian daripada makhluk dan alam ciptaan Allah SWT. Justeru, kehidupan, gelagat dan karenah manusia dipanggil sebagai alam manusia. Tambahan pula terdapat alam-alam lain seperti alam jin, alam malaikat, alam binatang, alam dunia, alam kubur, alam akhirat, alam langit, alam kosmologi dan seumpamanya.

Umat Islam meyakini bahawa Allah SWT merupakan sumber kepada segala ilmu. Allah SWT yang bersifat dengan sifat *al-'alim al-khabir*, Yang Maha Mengetahui dan Maha Mendalam Pengetahuan-Nya terhadap segala makhluk-Nya dan mengetahui sekecil-kecil perkara yang zahir dan yang batin. Firman Allah SWT dalam surah al-An'am, ayat 59, maksudnya:

*“Dan di sisi Allah segala kunci perkara-perkara ghaib, tiada siapa pun mengetahuinya melainkan Dia. Dia Maha mengetahui*